

QUO VADIS BASILEA

I

Dr Bärni Heusler sait zem Georg Heiz,
du Schorsch – ich bruuch glaub jezz en andere Raiz.
Die vyyle Johr bim FCB,
das han ich schlicht und aifach gseh.
Druff sait dr Heiz zem Heusler Bärni,
ich waiss, was d meinsch und so gärn i
dFCB-Familie au ha,
ich waiss, dass ich no anders kaa.
Dr Pipi Streller soll jetzt aane,
zämmme mit andre Veterane.
Mit em Alex Frei und – es goht nit ohni,
Nämme mr no dr Ceccaroni.
Jezzt bruuchts no aine mit vyyl Gäld,
e Maa mit Stil – e Maa vo Wält.
Dr Bärni Burgener isch ganz schnäll gfunde,
mit ihm gohts in die näggchte Runde.
Är sait: Mir mien non e Altascht eliminiere,
dr Fischer soll goo und anderi trainiere.
Är passt halt nimm ins nej Konzäpt,
e junge Trainer ischs Erfolgsrezept,
stoht aane, iiberlegt und sait: «veni, vidi, vici, *
i will als Trainer dr Raphael Wicki».

* (ich kam, sah und siegte)



QUO VADIS BASILEA

II

Dr Hampe lauft gmetig dStaine duure,
är isch e weeneli upp dr Schnuure.
Die vyyle negatyve Bricht
hänn en mööge – dä armi Wicht.
Är spaziert wyter dur syy Stadt
und findet sy Stadt so schampar glatt.
Kai Auto, wo syy Wääg duet kryzze,
numme Velo, wo an ihm vrby dieen flizze.
Är lächlet seelig – lüpft syy Huet
und findet sy Velostadt aifach guet.
So kunnt er ändlig am Märtplazz aa,
wird deert empfange mit vyyl Traraa.
D'Autopartei – dBasler Frakzion
stoot in dr Mitti und lydet bi
deere Akzion,
si steen vor em Hampe – mit
em Rugge zer Wand,
«dAutofahrer morituri te
salutant» *.

* (die Todgeweihten
grüssen dich)



QUO VADIS BASILEA

IV

Unser toll Präsidialdepartemänt,
das isch allwägg ganz glyy am Änd.
Vom Rääge in d'Traufi – so kaa me saage
und das ligt is doch ganz schwäär uff em Maage.
Acht Joor hett is dr Morin quäßl,
denn hett me sElisabeth in d'Regierig gwäßl.
Dr Morin hett wenigschtens d'Stadt representiert,
als glaine Keening die Stadt fascht regiert.
Jetzt duet sElisabeth deert residiere,
wie dr Morin d'Regierig präsidiere.
Fir ihri Ufftritt brucht si rácht vyyl Muet,
denn s'Reede ligt ere nit so im Bluet.
Sisch nit so aifach in dr Regierig zbrichte,
wie in dr Schuel Muusig zuniterrichte.
So wie si unsere Kanton duet verdrätte,
es kennt aim glatt dr Nuggi uuse jätte,
aber stoisch blybt si uff ihrem Poschte,
duet dr Styrrzaaler mängge Frangge koschte.
«Sine vitius nemo nascitur» *sait si sich und stellt uff stur.

* (ohne Fehler wird niemand geboren)

QUO VADIS BASILEA

III

Im Roothuus wird – so wird is brichtet,
allerlai verzellt und au vyyl dichtet.
Dr Grossi Root duet deerte sizze,
im Winter friere und im Summer schwizze.
Gar mängg Mool sinn die hundert Reet,
nit ganz hundert – wie me heert.
Die weenige, wo im Saal dien blybbe,
sinniere, wie si sich d'Zyt kenne vertrybbe.
Ob mit Zytig lääse oder Krizzi lööse,
oder au e weeneli dööse.
Die andere sinn lieber im Saal vornedraa,
wo men au schnäll e Pläuschli ka haa.
Mit Bier und Wy dieen si d'Lampe fille
und soo e mänggi Abstimmig kille.
«Nunc, vino pellite curas» *, haisst
ihri Devyyse
und stirze drmit Basel in die
näggshchi Kryyse.

* (Vertreibt jetzt die Sorgen mit Wein)



QUO VADIS BASILEA

V

sSchuelraisli vom Regierigsroot,
sunscht amme mit em Zug ganz komood
findet das Johr – und das isch ganz glatt,
in Basel und dr Umgäbig statt.
Zerscht gits e Faart mit em Drämmli,
deert will dr Hampe den andere nämmlie,
zaige was är drbyy hett dänggt,
won er de Waggis die Millioon hett gschänggt.
So steehn die siibe aadächtig nääbenenand,
luege ibar dGränze ins Nochberland
und gseehn deert das grossi Nüt,
wo dr Hampe hett dänggt,
won er de Waggis die Millioon hett
gschänggt.
«De nihilo nihil» *, hänn scho die alte
Reemer gsait.
Ob das unseri Regierig no lang so vertrait?

* (aus nichts entsteht nichts)



FASNACHT 2018

gründet 1975



QUO VADIS BASILEA

VI

Wär mag sich no an die Zytte bsinne,
wos zBasel in dr Stadt zmitts inne
so tolli und glatti Baizli hett kaa.
Wo me scheeni Zytte hett kenne haa,
s'neije Warteck, s'Muulbeeri und au s'Reh,
vo deene isch hitt nyt me zgseeh.
Wiisegarte und au dr Wienerwald,
die alli fähle zBasel halt.
D'Fregatte, dr Gryffe und dr Leue,
hänn miesse Plass mache fir all das Neue.
Bierkäller, elle et lui und dr Dufp vom Mandy,
fähle glych wie im Klingeli dr Andy.
Im Grossbasel d'Gärbe, d'Bennys Bar,
Gambrinus, Paradyss und no son e paar.
Tempi passati * – aber scheen isch es gsi.
Drum tene, quod bene ** – sunscht isch alles hii.

* (vergangene Zeiten)

** (halte, was gut ist)



MIR DANGGE:

de Susy und de Esthy für die fyne Pointe,
em Larvemacher
fir d Larve und d Zeichnige,
de Schnidere Angela und Daniela,
de Haut-Couture vo Basel

de Michelle fir sfötteli
und de Anita fir sLayout.
Drugg:
Druckerei Krebs AG
seit 1734

ZBASEL AN MYM RHY

zBa - sel an mym Rhy, jo, deert mecht i sy!
Waith nit d Luft so lind und lau, und der Himmel isch so blau
zBasel, zBasel, zBasel an mym Rhyl

Fasnacht an mym Rhy
und mir sinn derby
Joor fir Joor am Waagebau
Zeedel Goschdyym sinn e Schau
Basler Fasnacht und mir sinn derby
Basler Fasnacht und mir sinn derby

Wottsch e bsundre Raiz
goosch z Oobe in e Baiz
mir intrigiere queer dur d'Stadt
e mängge Bebbi findets glatt
Schineblooser jo das mecht i syy
Schineblooser jo das mecht i syy

zBasel an mym Rhy
jo deert mecht i syy
gaudeamus igitur *
so singe mir das Lied in Dur
zBasel isch Fasnacht und mir sinn drbyy
zBasel isch Fasnacht und mir sinn drbyy

* (so wollen wir uns aber freuen)

www.schineblooser-waggis.ch



GLEISUS BLASIUS



MCMLXXV